

Sanaartugassanut Iluarsagassanullu Aningaasaateqarfik pillugu 2008-imut nassuiaat.
(Ineqarnermut, Attaveqarnermut Angallannernullu Naalackersuisoq)

Saqqummiussissut

Matumuuna Naalackersuisut sinnerlugit Sanaartugassanut Iluarsagassanullu Aningaasaateqarfik pillugu 2008-imut nassuiaat saqqummiutissavara.

Missingersuusiornermut inatsimmi aalajangersarneqarpoq, *“Naalackersuisut Sanaartugassanut Iluarsagassanullu Aningaasaateqarfiup ingerlatai pillugit ukiumoortumik nassuiaasiortassapput, tassungalu ilannguttassallugit tulleriinneri malillugit pilersaarusiata nutaat, pilersaarusiata ingerlanneqartut kiisalu pilersaarusiata naammassineqarsimasut taamaatinneqarsimasulluunniit killiffii pillugit nassuiaatit.”*

Sanaartugassanut aningaasaliissutinut tunngatillugu suleriaatsit eqaannerulersinniarlugit Sanaartugassanut Iluarsagassanullu Aningaasaateqarfik 2000-imi pilersinneqarpoq. Namminersorlutik Oqartussat aningaasanik sanaartugassanut iluarsagassanullu atugassanik Inatsisartut Aningaasanut Inatsisaanni ukiut tamaasa immikkoortitsisarput, taanna sanaartornermi killiliussanik taaneqartarpoq.

Erseqqissaatigineqassaaq Sanaartugassanut Iluarsagassanullu Aningaasaateqarfik missingersuusiaareersimasunut aningaasaateqarfimmat, aningaasanik qinnuteqarfigineqarsinnaanngitsoq. Aningaasat aningaasaateqarfimmi nalunaarsorneqartut suliassanut aalajangersimasunut pituttugaapput.

Sanaartugassanut Iluarsagassanullu Aningaasaateqarfimmi aningaasanik nuussisoqassappat, tamanna suliassamik aalajangersimasumik taamaatitsinikkut allanngortitsinikkulluunniit pisussaavoq, tamannalu pissappat Inatsisartut Aningaasanut inatsisissaannut siunnersuutip suliarineqarneranut atatillugu imaluunniit ingerlaavartumik Inatsisartut Aningaasaqarnermut Ataatsimiititaliaata aalajangersimasumut tunngatillugu akuersissuteqarneratigut, politikkikkut akuersissuteqartoqartussaavoq.

Matumani annikitsualuit tikissanngilakka, taamaallaalli nassuiaammi pingaernerit ilaat saqqummiutissallugit.

2007-imi 792 mio. koruunit 2008-imi atugassatut nuunneqarput. Taakku saniatigut 2008-imi sanaartornermut suliassaqarfimmut 969 mio. koruunit, suliassat nangeqqinneqarnissaannut suliassallu allat nutaat aallartisarneqarnissaannut ilassutigineqarput. 2008-imi taamaalilluni suliassanut aalajangersimasunut atugassat 1.744 mio. koruuniusimapput, taakkunanga 864 mio. koruunit atorineqarsimallutik. Taamaalilluni Sanaartugassanut Iluarsagassanullu Aningaasaateqarfimmiittuutit 2008-ip ingerlanerani 105 mio. koruuninik annertusisimapput, aningaasaateqarfimmiittuutit 2008-ip naanerani suliassani 373-iusuni ingerlasuni 880 mio. koruuninik annertussuseqarsimallutik.

Naalackersuisut ukiuni qaangiuttuni suliniutigisimasaasa ilaat tassaasimavoq suliata naammassineqartarnissaat. Taamaattumik nuannaarutigalugu paasivara suliata 110-it

naammassineqarsimasut, suliallu 8-it taamaatinneqarsimallutik. Suliassat 118-iusut taakkua naammassineranni ataatsimut katillugu aningaasaateqarfimmiittuutit 17 mio. koruuninik appartinneqarsimapput. Taamaattumik suliat taakkut Sanaartugassanut Iluarsagassanullu Aningaasaateqarfimmit peerneqarsimapput. Naalakkersuisut Sanaartugassanut Iluarsagassanullu Aningaasaateqarfimmi sulianik naammassisaqartarnissaq suli pingaartillugu anguniagarissavaat.

2008-imut aningaasanut inatsisikkut aningaasaliissutit amerlanersaasa atuarfiliormut, inissialiortiternermut aammalu innaallagissamik, imermik kiassarnermillu pilersuinermit sanaartugassanut atorneqarnissaat Inatsisartunit 2007-imitulli salliutinneqarsimavoq. Taamaattumik aningaasaliissutit amerlanersaasa suliassaqarfimmi taakkunani atorneqarsimanerat nuannaarutissaavoq.

Inuinnaat inissialiortiternerannut tunngatillugu 248 mio. koruunit 2009-imut nuunneqarput. Tamannali suliassaqarfimmi tassani sulianut tunngatillugu pissusiviusunik takutitsinngilaq. Tassami sanaartugassanut allanut pisarneq assigalugu aningaasaliissutit ingerlaavartumik akilerneqarneq ajorput, aatsaalli sanaartukkat naammassinerini akilerneqartarlutik.

Neriuppunga Inatsisartut nassuiaammik atuaanermi pissarsiaqarluarsimassasut, oqallilluarnissarlu qilanaaraarput.

Taamatut oqaaseqarlunga Sanaartugassanut Iluarsagassanullu Aningaasaateqarfik pillugu 2008-imut nassuiaat Inatsisartunut kajumittumik suliassanngorlugu tunniuppara.